

37
 spicuum est quod in nobis situm est, ut vel obtemperemus, vel non obtemperemus Diaboli insidiis: neque ullam necessitatem patimur ab illo.

Juxta Quesnellum quotiescunque diabolo bona opera dissuadenti obtemperamus, non fuit in potestate nostra insidiis ejus resistere, vel suasionibus dissentire. Unde in Quesnelli principio patimur insuperabilem omittendi boni operis, etiam præcepti, necessitatem.

19 Rursus idem Sanctus Hom. 19. in Gen. ait: Peccatori nullas admonitiones prodesse; non quia non potest, sed quia non vult. Quesnellus docet, cuicumque peccatori ad conversionem admonitiones non profunt, prodesse non potuisse; quia sine gratia efficaci non solum nihil boni facimus, sed nec facere possumus.

20 S. Augustinus lib. de spiritu & litte. cap. 34. Consentire vocationi Dei, vel ab ea dissentire propria voluntatis est. Adeoque quisquis dissentit, poterat consentire. Juxta Quesnellum autem ex omnibus, qui dissentiunt vocationi Dei, nè unus quidem consentire potuit, quia defuit illi gratia efficax, sine qua non solum nihil fit, sed nec fieri potest.

21 Idem Sanctus lib. 2. de Gestis cum Felice Manich. cap. 4. Habet unusquisque in voluntate, aut eligere quæ bona sunt, & esse arbor bona; aut eligere quæ mala sunt, & esse arbor mala... hoc ergo Dominus dicens aut facite illud, ostendit esse in potestate quod facerent, & quia si bonum eligerent, præmium illius acciperent, si malum eligerent, pœnam illius sentiant. Si Quesnellum audimus, nullus, qui est arbor mala, efficere potuit, ut esset arbor bona: omnes, qui prætermissione operis præcepti peccarunt; etsi bonum eligere non potuerint, nec malum fugere; tamen pœnam illius sentiunt.

22 Idem Sanctus lib. 50. homiliar. hom. 16. In tuo arbitrio Deus posuit, cui pares locum, Deo, an diabolo. Quod Augustini dictum, ut patet, non ad eos tantum qui Deo locum parant; sed etiam ad alios dirigitur: juxta Quesnellum autem ex omnibus, qui post lapsum Adami locum paraverunt diabolo, nè unus quidem fuit, qui Deo locum parare potuerit, nè unus quidem, in cujus hoc Deus posuerit arbitrio.

23 Idem lib. 3. de Lib. arb. cap. 18. Quis peccet in eo, quod nullo modo cavere potest? Peccatur autem; cavere igitur potest. Juxta Quesnellum quisquis præcepti operis omissione peccat, cavere peccatum illud non potuit, nec tamen à culpa liberatur, aut pœna.

24 In Quesnelli sententiam Augustinus hanc censuram evibrat, libro de Fide contra Marcianos cap. 9. Quis enim non clamat, stultum

esse præcepta dare ei, cui liberum non est quod præcipitur, facere: & iniquum esse, eum damnare, cui non fuit potestas jussa complere? Damnat Quesnellus omnes præcepta opera non implentes; etsi nulli eorum fuerit implendi potestas.

25 Rursus idem Sanctus lib. de Duabus animabus cap. 11. docet Neminem vituperatione, suppliciove dignum, qui id velit, quod justitia velle non prohibet, AUT ID NON FACIAT, QUOD FACERE NON POTEST. Nonne ista cantant & in montibus pastores, & in theatris poëta, & indocti in circulis, & docti in bibliothecis, & magistri in scholis, & Antistites in locis sacris, & in orbe terrarum genus humanum? At Quesnellus non solo Augustino; sed & toto genere humano sapientior, docet omnes oppositum; videlicet ut deinceps cantent, & in montibus Pastores, & in theatris Poëta, & indocti in circulis, & docti in bibliothecis, & Magistri in scholis, & Antistites in locis sacris, & in orbe terrarum genus humanum, omnes vituperatione, & supplicio dignos esse, qui opus præceptum non faciunt, quod facere non potuerint.

26 S. Paulinus Epist. 8. ad Severum Quæ ergo misero mihi suppedit venia peccati? Agnovi bonum, & feci malum, cum æquè mihi liberum esset bonum facere. Falleris Pauline, si Quesnello fides est: nunquam fecisti malum quando potuisti bonum facere: nec unquam bonum facere potuisti, quando fecisti malum; utpote destitutus gratia efficaci, sine qua non solum nihil boni fit, sed nec fieri potest.

27 Cyrillus Alexandrinus lib. 4. in Joannem cap. 3. Liberum homo animal est, & potest, sive dextrum virtutis, sive sinistrum vitii velit, iter eligere. Quænam eligendæ virtutis libertas in eo, qui gratiâ caret efficaci, si absque ea nihil boni, ut Quesnellus asserit, fieri potest?

28 Idem Cyrillus lib. 9. cap. 10. Rationali creatura liberam potestatem Creator largitus est, & suæ voluntatis habenas unicuique commisit, ut in eo sit, quidquid probaverit, eligere; Quam potestatem liberam ad bonum concessit Deus omnibus, quibus negat gratiam efficacem, si absque illa non solum nihil fit, sed nec fieri potest?

29 Author libri 2. de Vocatione gentium cap. 12. Certissimè noverimus, nullum fidelium à Deo non discedentem relinqui, neque cujusque ruinam ex divina esse constitutione dispositam. Ex damnatâ verò propositione sequeretur, omnes, etiam fideles, dum opus præceptum non implent, magis propriè à Deo relictos dici, quàm ab eo discessisse; quia in bono perseverare non poterant, destituti gratiâ effi-